



Rector Academiae Ienensis Henricus Hoffmannus Mathem. P. P.
Et Caeteri Professores Civibus Academicis To Xaipein : Resurrectio
Dominica, cuius memoriam in hac solenni festivitate celebramus, ex morte
tristitiae & peccatorum nos omnes exuscitare debet, ut & Victori nostro
ex mortuis redeunti laeto pectore occurramus, & cum ipso resurgente
spiritualiter resurgamus ... P.P. in festo Paschatos, Ann. 1619.

Jena


Hofmann, Heinrich

Phil 2° 00268/04 (158)

https://dhb.thulb.uni-jena.de/receive/ufb_cbu_00007457

urn:nbn:de:urmel-9aa635ab-cd18-478a-bf1f-92a33e5dda215-00006822-15

Lizenz: <https://creativecommons.org/licenses/by-sa/4.0/>



Rector Academiæ Jenensis

HEINRICUS HOFMANNUS

MATHEM. P. P. ET CÆTERI PROFES-

SORES CIVIBUS ACADEMICIS TO' XAIPEIN.



Resurrectio Dominica, cujus memoriam in hac solenni festivitate celebramus, ex morte tristitiæ & peccatorum nos omnes exscita-
re debet, ut & Victori nostro ex mortuis redeunt læto pectore occurramus, & cum ipso resurgente spiritualiter resurgamus. Latari & exultare cum resuscitato convenit, quia
resurrectio illa & Christo propter peccata nostra prius mortuo fuit gloriosa & nobis propter peccata mortui æterna adjudicatis fructuosa. Gloriosam Redemptori nostro resurre-
ctionem esse nemo dubitat, qui passionis ignominiam & resurrectionis gloriam invicem comparat. Cujus calcaneo serpentes dentes infixerat in passione, is caput serpentis
conculcat in resurrectione. Dilectus noster, qui rubicundus fuerat in passione ob sanguinis effusionem, is candidus apparet in resurrectione ob gloriæ & immortalitatis in-
ductionem. Qui veniens ex Edom rubicundus & cruentis vestibus circumdatus erat in prætorio, is stolâ candidâ fulgidus prodit ex tumulo, velut Sponsus ornatus ex suo
agnus patientissimus, resurgit ut Leo fortissimus. Resurgit & sepulchri antro caro rediiva Phœnicis, quam decoxerat cinamomum pietatis; granum frumenti, quod in terram
projectum & mortificationem erat in passione, vivificatur & copiosos fructus profert in resurrectione. Lignum illud, quod in morte erat exsiccatum, reviviscens pristino recepto
virore in sublime est elevatum. Qui in passione exaruerat ut testa, in resurrectione floret ut virga Aaronica. Nec floret solum, sed & suavissimos fructus profert. Resurre-
ctionis enim Dominicæ fructus in hac vita est nostra coram Deo justificatio. Qui propter peccata nostra mortuus est in ara crucis, is propter justificationem nostram resurrexit ex claustris mortis. Tri-
buitur autem Christi resurrectioni nostra justificatio propter justitiæ nobis partæ obligationem ac confirmationem. Laboraverat fidelis ille Dei servus usque ad sanguinis sudoris profusionem, laborave-
rat ipsius anima usque ad suam à corpore separationem, si in morte ac sepulchro mansisset, de perfecta justitiæ acquisitione, de sufficiente lytri perfolutione ac nostra cum Deo reconciliatione per-
petuò nobis dubitandum fuisset. Equis enim non cogitasset, neque id immerito, ipsum ab hostibus, cum quibus in certamen descenderat, fuisse victum & captivatum, ab igne iræ divinæ, quem in pas-
sione fenserat, absumtum & devoratum, proinde etiam nec plenam satisfactionem ab ipso præstitam, nec intercessionem ejus à Patre exauditam, nec perfectam justitiæ adductam? Sed quia ex morte
redivivus resurgit, illud argumentum & indicium est certissimum, quod redemptionis opus plenè perfecterit, ignem furoris divini fluentis sui sanguinis extinxerit, infernales hostes devicerit,
mortem in victoria absorpserit, inferni carcerem destruxerit, adeoque ut triumphator nobilis ex pugna redierit. Samson in urbe Gaza conclusus & à Philistæis custoditus mediâ furgens nocte portas
urbis aufert & in montem secum transfert; Portarum elevatio liberationis fuit testificatio. Christus in sepulchri & inferni carcere constitutus perripuit virtutis suæ divinitatis ac portas mortis & inferni
destruxit, ut verè jam dicere possit. Fui mortuus, & ecce sum virus, & habeo claves mortis & inferni. Portarum debellatio & clavium gestatio est liberationis est morte & inferno confirmatio. David
in duellum cum Goliatho descendens in oculis Israeliticis exercitus videbatur mortuus, sed ex duello rediens & caput Goliathi à trunco abscissum secum referens se victorem fuisse ostendit; redi-
tus ex loco pugne signum fuit obventæ victoriæ. Christus post prælium cum infernali Goliatho commissum ex morte resurgens victoriam ex suis partibus fuisse confirmat, ipsius ergo resuscitatio est
victoriæ ab hostibus reportatæ obligatio. Sponsor ob aliena debita in carcerem coniectus, si postmodum à creditore non solum liberetur, sed etiam honoretur, manifestum exhibet indicium, creditori
à se plenè satisfactum esse, sic Christus propter peccatorum nostrorum debita in sepulchri carcerem ac mortis pulverem erat coniectus, sed quia coelestis Pater, Deus pater, ex mortuis magnum illum Pa-
torem ovium Sponsorem nostrum reducit & in coelestis gloriæ sublimitate elevat, eo ipso testatum facit, sibi pro peccatis nostris plenissimam satisfactionem esse præstitam & perfectam justitiæ,
à Christo nobis esse promeritam. Neque verò tantum propter justitiæ nobis partæ confirmationem, sed etiam propter arduissimam nostram cum Christo conjunctionem resurrectioni Christi justi-
ficatio nostra ab Apostolo tribuitur, quia resurrectio Christi non solum est satisfactionis plenè præstitæ & justitiæ perfectæ adductæ testificatio, sed etiam realis & actualis peccatorum absolutio omni-
bus verè in Christum propter peccata nostra mortuum & propter justificationem nostram resuscitatum credentibus facta. Ut enim Pater coelestis, cum Christum in mortem tradidit, peccata nostra
in ipso judicavit, sic quando eum ex morte resuscitavit, ipso facto nos à peccatis in eo absolvit, proinde ut Christus factus est pro nobis peccatum in sua passione, ita facti sumus in eo justitia in ipsius re-
surrectione. Si Christus non resurrexit, inquit Apostolus, adhuc estis in peccatis vestris, utique ergò per contrarium procedendo, quia Christus verè resurrexit, absoluti sumus in ipsius resurrectione
à peccatorum vinculis, in quâ peccatorum remissione nostra coram Deo justificatio consistit. Accedit ad hanc causam insuper tertia justitiæ scilicet partæ applicatio. Preciosum quidem merito-
rum thesaurum in morte ac passione sua Christus nobis promeruit, sed si in morte mansisset, thesauri illius non fuisset facta distributio, nec beneficiorum tam caro precio partorum applicatio. Qui ex
bello victor redit, is spolia postmodum distribuit, sic postquam Christus superatis hostibus suis victor surrexit, decus domus spolia dividit. Per concionem Evangelii peragitur distributio illius bene-
ficii, per verbi prædicationem Christus post resurrectionem ad dextram Patris exaltatus perficit justitiæ nobis partæ applicationem. Hicigitur preciosissimus est resurrectionis Christi in hac vita fru-
ctus, nostra scilicet coram Deo justificatio, ad quam accedet post hanc vitam nostra ad coelestem gloriam resuscitatio. Corpus resurrectionem sibi promittere non auderet, nisi caput prius à mortuis ex-
urgeret, sed quod jamdum præcessit in capite, illud certò secuturum novimus in membrorum reliquorum compage. Vivo ego & vos vivetis, exclamat caput. Vivit caput nostrum & nos vivemus,
membra respondeant. Quia Christus caput nostrum mortuus est pro nobis, ideo & sibi vivit & nobis, quia enim vivit ille, & nos vivemus. Christi resuscitatio est sepulchrorum nostrorum referatio. Ut
in Christi passione peccatorum nostrorum ignominia, sic in Christi resurrectione futura corporum nostrorum conspiciatur gloria. Quare cum resurrectio Christi sit non ipsi solum gloriosa, sed nobis
etiam fructuosa, æquum est nos resurgenti congaudere, interim non negligamus cum ipso resurgente etiam ex morte peccatorum surgere. Pro omnibus mortuus est, ut qui vivunt, non sibi vivant,
sed ei, qui pro ipsis mortuus est & resurrexit. Non ergò vivamus nobis illicita carnis desideria sectando, sed vivamus Christo in novitate vitæ ambulando. Christus ex mortuis surrexit, etiam nos cum
ipso surgamus. Christus in vitam rediit, etiam nos cum ipso ad spiritualis vitæ semitam redeamus. Christus mortis vincula dirupit, nos ergò peccatorum vincula abjiciamus. Christus portas inferorum
aperuit, è Satanæ igitur captivitate examus. Christus Diabolum devicit, ex ipsius igitur servitio fugiamus. Christus veterem hominem mortificavit, renovationem igitur novi hominis perficiamus.
Vetera transierunt, ecce nova facta sunt omnia, in Christo igitur sumus nova creatura. Omnes proinde jurisdictioni nostræ subiectos cives seriò hortamur, ut veteris hominis opera ac desideria in hoc
sanctissimo Dominicæ resurrectionis festo penitus exuant, vitam ac mores ad sinceram pietatem & honestatem componant, conciones sacras, quæ tunc defructibus Christi resurrectione humano ge-
neri promeritis, tum de spirituali resurrectione ab omnibus verè piis requisita ex verbo Dei instituentur, studiosè frequentent, ac more laudabiliter recepto illis, qui Evangelium, hoc est, lætum illud
de resurrectione Christi nuncium nobis prædicant, Evangelium, hoc est, boni illius nuncii præmium aliquod distribuunt, cum enim spiritualia nobis seminant, æquissimum profectò est, ut corporalia
nostra metant. Qui in eo sese obsequentes exhibebunt, cum Christo spiritualiter se resurrexissent testatum facient, & quia in spiritu seminant, ex spiritu præmia hujus & futuræ vitæ metent, quæ con-
cedat nobis Christus ex mortuis suscitatus & ad dextram Patris exaltatus in secula benedictus. P. P. in festo Paschæ, Ann. 1619.

TPIS JOHANNIS BEITHMANNI

urn:nbn:de:urmel-9aa635ab-cd18-478a-bf1f-92a33e5dda215-00006822-25